

ZAKON
O DRUŠTVU CRVENOG KRSTA/KRIŽA
BOSNE I HERCEGOVINE

I - CILJ I STRUKTURA

Član 1.

Ovim zakonom utvrđuje se Društvo Crvenog krsta/križa Bosne i Hercegovine (u daljem tekstu: Društvo) kao nacionalna organizacija Crvenog krsta/križa Bosne i Hercegovine, uređuje njegov pravni položaj, reguliše struktura, nadležnost i pravo na vršenje javnih ovlaštenja, finansiranje, nadzor nad zakonitošću rada i druga pitanja značajna za djelovanje Društva.

Član 2.

Društvo je dobrovoljna humanitarna organizacija građana Bosne i Hercegovine, priznata i ovlaštena da, na osnovu Ženevskih konvencija (I-IV) od 12. avgusta 1949. i njenih Dopunskih protokola I i II od 10. jula 1977. godine (u daljem tekstu: Ženevske konvencije), u miru i za vrijeme elementarnih i drugih nepogoda, vanrednih stanja, u skladu sa načelima humanosti, nepristrasnosti, neutralnosti, nezavisnosti, dobrovoljnosti, jedinstva i univerzalnosti, ostvaruje određene humanitarne ciljeve, zadatke i javna ovlaštenja u oblasti zdravstva, socijalne zaštite, obuke, Službe traženja i pružanja pomoći medicinskim službama oružanih snaga u vrijeme oružanog sukoba.

Član 3.

Društvo ima svojstvo pravnog lica.

Član 4.

Društvo je jedina organizacija Crvenog krsta Bosne i Hercegovine koja djeluje na cijeloj teritoriji Bosne i Hercegovine, a čine ga Crveni križ Federacije BiH i Crveni krst Republike Srpske i sve njihove organizacije. Društvo je priznato od Međunarodnog komiteta Crvenog krsta 8. maja 2001. godine.

Djelovanje i način rada entitetskih organizacija Crvenog krsta uređuje se entitetskim zakonima i statutima entitetskih organizacija.

Član 5.

Znak Društva je krst crvene boje sa pet jednakih kvadrata na bijeloj podlozi u skladu sa Ženevskim konvencijama i jedini je zakoniti znak u Bosni i Hercegovini.

Društvo je ovlašteno da upotrebljava znak u sve svrhe predviđene Međunarodnom konvencijom Crvenog krsta i Crvenog polumjeseca, u skladu sa Ženevskim konvencijama, sadašnjim zakonom i propisima o upotrebi znaka Crvenog krsta ili Crvenog polumjeseca od strane nacionalnih društava.

II – DJELATNOSTI I VRŠENJE JAVNIH OVLAŠTENJA

Član 6.

Djelatnosti društva su:

- predstavljanje i zastupanje Bosne i Hercegovine (u daljem tekstu: BiH) u međunarodnim asocijacijama Crvenog krsta i pred drugim nacionalnim organizacijama;
- sprovođenje međunarodnih obaveza koje je preuzela BiH u oblastima kojima se bavi i za koje je nadležan Crveni krst;
- koordiniranje djelovanja struktura Crvenog krsta u BiH;
- organizovanje Službe traženja;
- upravljanje imovinom i sredstvima Društva;
- zaštita znaka i naziva Društva;
- učešće u organizovanju i pružanju socijalne pomoći i zdravstvene zaštite građanima u slučaju elementarnih nepogoda, epidemija i drugih većih nesreća;
- rad na zdravstveno-socijalnoj zaštiti i na zdravstvenom prosvjećivanju stanovništva i učešće u organizovanju razni oblika međusobne pomoći građana u duhu humanizma i solidarnosti;
- učešće u organizovanju pomoći za žrtve elementarnih nepogoda i oružanih sukoba i raspoređivanje pomoći primljene od nacionalnih i međunarodnih društava;
- organizovanje prikupljanja pomoći u BiH i slanje u inostranstvo pomoći koju državni organi, preduzeća i drugi darodavci pružaju radi ublažavanja posljedica elementarnih nepogoda, epidemija i oružanih sukoba;

- saradnja sa zdravstvenom službom, sanitetskim službama oružanih snaga u BiH i civilnom zaštitom na zbrinjavanju povrijeđenih i oboljelih u slučaju oružanog sukoba, elementarnih i drugih nesreća;
- učešće u prihvatanju i smještaju evakuisanog stanovništva, izbjeglih i raseljenih lica i sprovođenju mjera koje mogu doprinijeti zbrinjavanju nastradalog i ugroženog stanovništva u slučaju prirodnih i drugih katastrofa;
- učešće u obuci stanovništva u pružanju prve medicinske pomoći;
- obuka kandidata i obavljanje ispita iz oblasti prve pomoći za vozače motornih vozila u okviru polaganja vozačkog ispita;
- učešće u organizovanju akcija dobrovoljnog darivanja krvi i animiranju građanstva u ovoj oblasti;
- vršenje poslova koji proističu iz odredbi Ženevskih konvencija i drugih međunarodnih obaveza koje je ratifikovala Bosna i Hercegovina u toj oblasti;
- obavljanje zadataka u pogledu diseminacije međunarodnog humanitarnog prava i osnovnih principa Međunarodnog pokreta Crvenog krsta i Crvenog polumjeseca, i drugih zadataka predviđenih zvaničnim dokumentima Međunarodnog pokreta Crvenog krsta i Crvenog polumjeseca; i
- vršenje i drugih poslova koji su određeni zakonom, kao i vršenje poslova u vezi sa tradicionalnim aktivnostima Crvenog krsta.

Član 7.

Javna ovlaštenja u okviru djelatnosti iz člana 6. Društvo vrši kroz strukture entitetskih organizacija izdavanjem uvjerenja i drugih javnih isprava.

Član 8.

Društvo u vršenju javnih ovlaštenja određenih ovim zakonom saraduje sa Međunarodnim komitetom Crvenog krsta, Međunarodnom federacijom društava Crvenog krsta i Crvenog polumjeseca, nacionalnim društvima Crvenog krsta, Crvenog polumjeseca i sa drugim srodnim nacionalnim i međunarodnim humanitarnim, socijalnim i zdravstvenim organizacijama.

Član 9.

U vršenju javnih ovlaštenja određenih ovim zakonom, Društvo saraduje sa državnim organima, organizacijama i fondovima u oblasti zdravstva, penzijskog i invalidskog osiguranja, socijalne zaštite i obrazovanja, sa oružanim snagama u Bosni i Hercegovini i civilnom zaštitom, diplomatskim i konzularnim predstavništvima, kao i sa drugim organizacijama, zajednicama, fondovima i udruženjima građana, kad je to od zajedničkog interesa.

Organi, organizacije, fondovi i zajednice iz stava 1. ovog člana dužni su, u okviru svog djelokruga rada, pružiti pomoć Društvu radi izvršavanja njegovih zadataka.

Š - ORGANIZACIJA

Član 10.

Organi Društva su:

- Skupština;
- Predsjedništvo i
- Nadzorni odbor.

Način izbora i djelokrug rada i odgovornosti organa Društva bliže će se utvrditi Statutom Društva.

Član 11.

Statutom, koji donosi Skupština, Društvo propisuje i utvrđuje zadatke organizacije, način rada, osnove finansiranja, organe i stručnu službu i njihova ovlaštenja i odgovornosti, kao i druga pitanja od značaja za djelatnost i ovlaštenja Društva.

Član 12.

U Društvu se osniva Služba traženja radi vršenja poslova obavještavanja o žrtvama rata predviđenih Ženevskim konvencijama i Pravilnikom o radu Službe traženja, uređuje način prikupljanja podataka o žrtvama oružanih sukoba, kao i vršenja drugih poslova koji proističu iz

Ženevskih konvencija, kao i organizaciju Službe traženja u Društvu i njegovim entitetskim organizacijama.

Savjet ministara Bosne i Hercegovine, na prijedlog Predsjedništva Društva, daje saglasnost na propise o organizaciji Službe traženja u strukturi Crevnog krsta Bosne i Hercegovine.

IV - FINANSIRANJE

Član 13.

Sredstva za finansiranje poslova iz nadležnosti BiH, koji proističu iz međunarodnih ugovora u čijem izvršavanju učestvuje Društvo, obezbjeđuju se u Budžetu BiH, za državni nivo Društva, a na nižim nivoima iz budžeta entiteta, kantona, gradova i opština.

Član 14.

U vršenju javnih ovlaštenja Društvo ostvaruje sredstva od naknade za usluge koje pruža u skladu sa ovim zakonom, od priloga, poklona i zavještenja pravnih lica i građana i iz drugih izvora utvrđenih propisima i Statutom Društva.

Za vršenje svojih djelatnosti Društvo koristi i posebna sredstva koja zajednice na svim nivoima izdvajaju u tu svrhu.

Član 15.

U slučaju elementarne nepogode, epidemije i druge veće nesreće, Društvo u vršenju svojih zadataka i poslova ima pravo prvenstva u snabdijevanju energentima, na ubrzani carinski postupak, ima pravo prvenstva u prevozu lica i materijala u svim sredstvima javnog saobraćaja, kao i pravo prvenstva saopštavanja vijesti putem sredstava javnog informisanja.

Član 16.

Za vršenje svojih djelatnosti Društvo će obezbjeđivati sredstva:

- od članarine redovnih i pomažućih članova,
- od priloga građana i pravnih lica, poklona i zavještenja,

- od prihoda ostvarenih u akcijama povodom Nedjelje Crvenog krsta Bosne i Hercegovine i Nedjelje borbe protiv tuberkuloze,
- od prihoda ostvarenih preko fondova zdravstvene zaštite, dječije i socijalne zaštite i drugih fondova za vršenje ugovorenih programa,
- od vlastitih uslužnih i drugih djelatnosti utvrđenih Statutom,
- iz prihoda ostvarenih od igara na sreću,
- od prihoda imovine i prava Crvenog krsta,
- iz budžeta opština, gradova, kantona, Brčko Distrikta, entiteta i Bosne i Hercegovine,
- iz drugih izvora utvrđenih Statutom u skladu sa ovim zakonom i drugim propisima.

Član 17.

Radi propagiranja djelatnosti i ciljeva Društva, kao i obezbjeđenja sredstava za izvršenje njegovih zadataka, Društvo organizuje Nedjelju Crvenog krsta Bosne i Hercegovine i Nedjelju borbe protiv tuberkuloze.

Nedjelja Crvenog krsta Bosne i Hercegovine održava se svake godine u drugoj sedmici maja, a Nedjelja borbe protiv tuberkuloze u trećoj sedmici septembra.

Član 18.

Za vrijeme trajanja Nedjelje Crvenog krsta Bosne i Hercegovine i Nedjelje borbe protiv tuberkuloze, pravna i fizička lica dužna su da prodaju markice koje za tu priliku štampa i distribuiraju nadležni organ Društva, u korist Društva.

Visina i način ostvarivanja prihoda iz stava 1. ovog člana uređuje se entitetskim zakonom.

Član 19.

Organizacije Crvenog krsta mogu za vrijeme Nedjelje Crvenog krsta Bosne i Hercegovine i Nedjelje borbe protiv tuberkuloze, kao i za vrijeme drugih organizovanih akcija solidarnosti, organizovati prikupljanje dobrovoljnih priloga.

Član 20.

Imovina Društva, uključujući i imovinu entitetskih, kantonalnih, Brčko Distrikta, gradskih i opštinskih organizacija Crvenog krsta, njihovi finansijski resursi i nepokretna imovina, prihod od aktivnosti, kao i donacije, biće oslobođeni svih poreza i carina.

Društvu od pojedinaca i pravnih subjekata biće oslobođene poreza za iznos vrijednosti donacije.

Postupak i način sprovođenja odredbi st. 1. i 2. ovog člana regulisaće se entitetskim zakonom.

V - NADZOR

Član 21.

Nadzor nad zakonitošću rada Društva vrši Ministarstvo za ljudska prava i izbjeglice Bosne i Hercegovine.

VI - PRELAZNE I ZAVRŠNE ODREDBE

Član 22.

Danom stupanja na snagu ovog zakona Društvo preuzima sva prava i odgovornosti prema zaposlenom osoblju, imovini i arhivu Crvenog krsta Bosne i Hercegovine.

Član 23.

Savjet ministara BiH će posebnom odlukom osnovati komisiju radi preuzimanja prava i obaveza iz člana 22. ovog zakona. Odlukom će se utvrditi sastav i način rada komisije.

Član 24.

Federacija Bosne i Hercegovine i Republika Srpska će, u roku od 6 mjeseci od dana stupanja na snagu ovog zakona, uskladiti svoje zakone o Crvenom križu, odnosno o Crvenom krstu sa odredbama ovog zakona.

Član 25.

Danom stupanja na snagu ovog zakona prestaje da važi Zakon o položaju i ovlaštenjima Crvenog krsta Republike Bosne i Hercegovine („Službeni list R BiH“, br. 21/92 i 13/94).

Član 26.

Ovaj zakon stupa na snagu osmog dana od dana objavljivanja u „Službenom glasniku BiH“ a objaviće se u službenim glasilima entiteta i Brčko Distrikta Bosne i Hercegovine.

PS BiH broj 110/04

21. oktobra 2004. godine

Sarajevo

Predsjedavajući

Predstavničkog doma

Parlamentarne skupštine BiH

Martin Raguž, s.r.

Predsjedavajući

Doma naroda

Parlamentarne skupštine BiH

Goran Milojević, s.r.